



Porodične veze (Meka)

Hatib: dr. Salih ibn Abdullah el-Humejd

29. rebiul-ahir 1446. godine po H. / 1. novembar 2024.

Hvala Allahu, Koji, kada obeća, ispuni, a kada zaprijeti, oprosti. Hvalim Ga, slavljen neka je On, i zahvaljujem Mu, On daje iz Svog obilja i u srca spušta zadovoljstvo. Svjedočim da nema boga osim Allaha, Jedinog, Koji nema sudruga, svjedočenjem koje približava Njemu. Svjedočim da je naš prvak i poslanik Muhammed, sallallahu alejhi ve sellem, Allahov rob i poslanik, odlikovani poslanik i odabrani vjerovjesnik. Neka su Allahovi blagoslovi i mir na njega, na njegovu porodicu i ashabe, ljude čestitosti, vrline i odanosti, te one koji ih slijede u dobročinstvu i idu njihovim putem.

O ljudi, preporučujem sebi i vam bogobožnost, pa se bojte Allaha, Allah vam se smilovao! Zar nije vrijeme da se probude oni koji spavaju? Zar nije vrijeme da se osvijeste oni koji su nemarni i da razmisle oni koji su razumom obdareni?

Smrt će potvrditi vijest o Sudnjem danu, pokazati istinu i otkriti razne pouke. Skrivenne stvari bit će izložene, unutarnji osjećaji otkriveni, udovi će svjedočiti i mrtvi će oživjeti. Kako li je loš povratak tlačitelja! Kako li je tužna sudbina propalih! "I upozori ih na bliski Sudnji dan kada će srca do grkljana doprijeti i popriječiti se, kada nevjernici ni prisna prijatelja ni posrednika neće imati koji će uslišan biti. On zna poglede koji kriomice u ono što je zabranjeno gledaju, a i ono što grudi kriju." (Gafir, 18–19)

O muslimani! Porodični život jedna je od najčvršćih i najvažnijih ljudskih veza, i zauzima uzvišeno mjesto u našoj vjeri. U našoj vjeri to je "čvrsta obaveza", kao što se navodi u Kur'anu: "i kada su one od vas čvrstu obavezu uzele." (En-Nisa, 21)

Porodični život je onaj u kojem supružnici žive dostojanstveno, dijeleći životne brige, u dobru i zlu, u teškoći i lahkoći, zdravlju i bolesti, bogatstvu i siromaštvu.





O vjernici! Međuljudske i porodične veze ne mjere se prolaznim trenucima ili iznenadnim situacijama, već se mjere nakupljenim iskustvima i stalnim događajima. To su dugotrajne veze, koje ne može gurnuti u zaborav jedan prolazan događaj, niti ih može uništiti jedna iznenadna situacija.

Porodični život, sa svim promjenama i stanjima, treba živjeti tako da u njemu vlada duh plemenitosti, da se sjećamo njegovih dobrih strana i dobročinstva. Nije od mudrosti, niti od razuma, niti od čestitosti da se godine ljubavi ruše u trenutku prolaznog gnjeva, u kojem supružnici zaboravljaju svijetle strane, trenutke radosti i dodire ljubavi i milosti, koje su živjeli i koje žive u većini dana svog života.

O muslimani! Uzvišeni Allah kaže u Svojoj Knjizi: "I ne zaboravite da jedni prema drugima velikodušni budete." (El-Bekara, 237) Ovo je plemenita uputa, veličanstveno pravilo i uzvišena mudrost, koja vrijedi za mnogo šire i općenitije situacije od onih u kojima je objavljena, a to je postupanje poslije razvoda.

Cijenjeni vjernici! Plemenitost je najviši stepen ponašanja, ona je stepen dobročinstva, i iznad stepena je pravednosti.

"I ne zaboravite da jedni prema drugima velikodušni budete" (El-Bekara, 237), tj. u svim vašim relacijama, srodstvu, braku, radu i prijateljstvu, i u svim životnim pitanjima.

"I ne zaboravite da jedni prema drugima velikodušni budete" (El-Bekara, 237) – ovo je uputa onima koje povezuje ova "čvrsta veza", i podsjećanje da, s protokom vremena, starenjem, porastom broja djece i povećanjem odgovornosti, ne zaborave dobrotu izgrađenu na lijepom suživotu, ljubavi, plaštu milosti i blagom postupanju od prvih dana.

"I ne zaboravite da jedni prema drugima velikodušni budete" (El-Bekara, 237), tj. da ostanu ljubazni, da se čuvaju prava, da među njima vlada milost i da srca ostanu čista. Zaboravljanje dobročinstva znači raskol, otuđivanje, svađu i udaljavanje od plemenitih osobina i visokih vrlina.





Pamćenje dobročinstva je ono što održava čvrstinu porodice i štiti je, s Allahovom dozvolom, od iznenadnih situacija i teških trenutaka. Zaboravljanje dobročinstva je ružno ponašanje koje, ako se proširi u društvu, kvari ga, a ako se proširi među ljudima, dijeli ih. Zaboravljanje dobročinstva znak je slabosti vjere.

O vjernici! U trenutku bijesa miješaju se dobro i zlo, istina i laž, kao da supružnici nisu proveli godine u ljubavi i lijepom suživotu, kao da ih ne povezuje zajednički dom, krov, krevet i pokrivač. Sve to preko noći postaje iluzija, pa ni muž ni žena ne pamte dobra djela onog drugog.

U trenucima bijesa, nasmijana lica pretvaraju se u tmurna, ispunjena spletkom, umorna, puna tuge i prevare. Ako pokušate pronaći opravdanje, zaprepastit će vas ono što čujete, što ne prihvata ni razum, a kamoli vjera ili plemenit karakter.

Da, sve što je dobro i pozitivno zasjenili su hirovi, a na njima niti svijet opstaje, niti poznaju plemenit karakter, niti zdravo prosuđivanje. Hirovi pretvaraju ljubav u mržnju, bliskost u udaljenost, nježnost u grubost i blagost u nasilje. Njima se "love" greške i traže mahane. Nema moći ni snage osim kod Allaha! Porodice se raspadaju, djeca gube i nemar postaje pravilo.

O vjernici! U trenucima bijesa tajne se otkrivaju, nivo kulture se pokazuje, svetinje se krše, a optužbe olahko iznose.

O muževi i supruge, čuvajte se zlonamjernih poziva, koji podstiču supružnike na pobunu i agresivnost, koji prenaplaćavaju mahane i negativnosti, koji su, inače, sastavni dio ljudske prirode i od kojih niko nije siguran.

Bračne veze, Allah vas čuvao, ne grade se na sukobima i svađama, podizanju glasova, prigovaranju i okrivljavanju, već se grade na plemenitom karakteru, prelasku preko grešaka, strpljenju i izdržljivosti. "Vjernik ne mrzi vjernicu, ako ne voli jednu njenu osobinu, zadovoljan je s drugom."

Pretjerana briga o detaljima porodičnog života kvari bračni život, narušava porodicu, čini druženja gorkima, a život neugodnim.





Čuvajte čast svojih domova, održavajte bračne odnose, budite nježni i tražite razloge za zadovoljstvo, čuvajte se špijuniranja, prisluškivanja, traženja grešaka i otkrivanja mahana. Znajte da priznavanje dobročinstva sjedinjuje srca, a bestidnost u svađama kida veze.

Kada osjetite da bi moglo doći do nesuglasica, sjetite se dobrih osobina i zanemarite mahane. "I ne zaboravite da jedni prema drugima velikodušni budete." (El-Bekara, 237)

Supružnik koji je najbliži bogobožnosti jeste onaj koji prašta i zaboravlja greške, i koji ne zaboravlja ljubav i dobročinstvo svojih ukućana. Nijedan plemenit čovjek ne ide do kraja u svojim zahtjevima. Praštanje grešaka gasi vatru zla. Utječem se Allahu od prokletog šejtana: "S njima lijepo živite! A ako prema njima odvratnost osjetite, moguće je da je baš u onome prema čemu odvratnost osjećate Allah veliko dobro dao." (En-Nisa, 19)

O vjernici! Brak je veza, ugovor, ljubav i milost, a ne raspuštenost i anarhija, niti lažna sloboda. Izgradnja bračne veze treba se temeljiti na dobroti i ljubaznosti, a ne na obračunavanju, prepirci i detaljnom ispitivanju. Jahja ibn Muaz, Allah mu se smilovao, rekao je: "U svom odnosu prema ljudima pokazujte i dobrotu, a ne samo pravednost, jer pravednost donosi detaljno ispitivanje, a dobrota trajnost."

Ne tražite sva prava do posljednjeg detalja, već ostavite mjesta za dobrotu, olakšajte i nemojte otežavati, budite tolerantni i ne tražite greške. Samo oni koji žele sreću mogu oprostiti greške, a previše prigovora razdvaja prijatelje. Lijepo postupanje znači gledati na dobre osobine i cijeniti ih, te praštati i skrivati loše osobine.

Dragi supružnici, komunicirajte s poštovanjem i vodite dijalog, imajući uvijek na umu posljedice, jer iza vas su slabašna djeca za koju se trebate brinuti. Bojte se Allaha i uvijek govorite istinu.

Bojte se Allaha svi zajedno, neka vam se Allah smiluje, i znajte da je prikladno u ovom trenutku skrenuti pažnju na jedan od ciljeva šerijata, a to je cilj očuvanja života i briga o uzrocima koji vode do njegovog očuvanja. Stoga, dostojno je za razboritog





muslimana da obrati pažnju na ove uzroke i da se brine o njima. Među tim uzrocima je briga o vakcinaciji, posebno onoj koja je povezana sa sezonama i mjestima gužve i okupljanja, poput sezonske gripe i slično. Pazite na to, brinite o tome, neka vas Allah sačuva. Neka Allah sačuva mene i vas i sve muslimane, i neka nas zaštiti od bolesti i tegoba, On je plemenit i milostiv.

Donosite salavate i selame na poslanika milosti, Muhammeda, Allahovog poslanika, jer vam je vaš Gospodar to naredio, rekavši: "Allah i meleki Njegovi blagosilju Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56)

